

BIBLIOTECA DE GALICIA

XUNTA DE GALICIA

Achégate á Biblioteca de Galicia

Que é a BdG

É a biblioteca central do Sistema Galego de Bibliotecas, que custodia todos os libros, en calquera tipo de soporte, que se editan en Galicia ou que, editados fóra, traten temas galegos ou estean escritos en galego.

Ademais de conservar e difundir eses fondos, así como un valioso conxunto de coleccións de publicacións singulares, a Biblioteca de Galicia é o centro de conexión da Rede de Bibliotecas Públicas de Galicia co ámbito bibliotecario internacional.

Servizos

Como centro depositario do patrimonio bibliográfico máis valioso de Galicia, a BdG está orientada fundamentalmente a investigadores, estudosos ou persoas interesadas na cultura galega. Os fondos en soporte físico resultan accesibles para as persoas dedicadas á investigación, sexa académica ou derivada dun interese particular, que poden acceder á documentación nas dependencias deste centro.

Tamén ofrece fondos dixitalizados a través da rede en Galiciana, así como un catálogo de acceso público.

A tranquilidade das súas salas está aberta ao público lector en xeral, con instalacións axeitadas para desenvolver a actividade intelectual nun marco arquitectónico incomparable.



A Biblioteca a fondo

Como naceu



A Biblioteca de Galicia (BdG) naceu coa denominación de Centro Superior Bibliográfico de Galicia, creado pola Lei de bibliotecas do ano 1989 para a recuperación, difusión e promoción do patrimonio bibliográfico galego. Actualmente, a BdG está regulada pola Lei 5/2012, do 15 de xuño, de bibliotecas de Galicia, que potencia o seu papel de institución central do Sistema Galego de Bibliotecas e a súa vertente de biblioteca dixital. A situación da súa sede na Cidade da Cultura permite abrir un amplo abano de servizos á disposición do público xeral.

Os seus fondos bibliográficos



A BdG conserva nos seus depósitos máis de oitocentos mil volumes.

Boa parte deles proceden da obriga da entrega dos exemplares esixidos como depósito legal de todo canto se publica en Galicia ou en galego fóra de Galicia; garántese así a actualización constante dos títulos producidos no noso país e en galego.

Conta tamén cunha excelente colección hemerográfica, mostra do xornalismo desenvolvido en Galicia ou polas comunidades galegas do exterior.

A BdG atesoura fondos dun gran valor para a nosa cultura, procedentes, entre outras orixes, da cesión particular de intelectuais galegos.



De que se ocupa



As principais funcións da Biblioteca de Galicia son:

- Recuperar, recoller, conservar, enriquecer e difundir o patrimonio bibliográfico, a produción bibliográfica galega e a relacionada co ámbito lingüístico e temático galego.
- Constituír a biblioteca dixital galega e actuar como centro de referencia na dixitalización do material cultural.
- Exercer a xestión do depósito legal e a propiedade intelectual.
- Xestionar o préstamo interbibliotecario.
- Elaborar directrices para o tratamento, a restauración e a dixitalización do patrimonio bibliográfico galego e para a creación de repositorios de libre acceso.
- Establecer relacións de colaboración e intercambio da Rede de Bibliotecas Públicas de Galicia co ámbito bibliotecario internacional.
- Favorecer a investigación científica e bibliográfica.



A BdG e a Rede de Bibliotecas de Galicia



A BdG funciona como cabeceira do Sistema Galego de Bibliotecas, cunha actividade especial no que atinxe á xestión de normativas, directrices, proxectos de catalogación e dixitalización compartidos, formación e dirección técnica etc.

A través deste sistema compártense as experiencias, xestionanse os recursos de xeito que flúan entre os distintos puntos do sistema e da rede, racionalízanse os esforzos globais etc.

Portada: *Un allo de vidro*, Castelao.

A Biblioteca Dixital, Galiciana

Un dos puntos esenciais para a preservación do patrimonio bibliográfico galego é garantir a translación dos contidos a través do tempo.

A BdG encárgase de transvasar a soportes durables e accesibles por internet a produción escrita, falada, feita música ou imaxe que se deu nas últimas centurias, coa dixitalización de imaxes, sons e da produción editorial, xornalística e escrita en xeral, de Galicia ou relacionada con Galicia; tanto a rexistrada no territorio da comunidade coma a que viu a luz grazas ao compromiso identitario das colectividade da emigración.

A Biblioteca Dixital permite acceder a unha colección de cartografía de Galicia, así como á información relativa ás autoras e autores galegos a través dunha base en constante actualización.

Esta biblioteca dixital, *Galiciana*, está integrada en proxectos nacionais e internacionais, como Hispana, Europea ou a World Digital Library.





Horario

- **Público xeral:** de luns a domingo, das 8.30 ás 20.00 horas. Todo o ano.
- **Persoal investigador (acceso a fondos de reserva):** de luns a venres, das 8.30 ás 14.30 horas, en horario de inverno. En horario de verán (de 15 de xuño a 15 de setembro), de luns a xoves das 9.00 ás 14.00 horas.

A sede

O edificio da Biblioteca e do Arquivo de Galicia sitúase na Cidade da Cultura, no monte Gaiás, en Santiago de Compostela, un vangardista complexo arquitectónico cun deseño en harmonía coa estrutura da cidade vella e co relevo natural que a rodea, de onde toma a suavidade curva dos seus volumes e a amplitude acolledora, como signos de identidade dun proxecto único.

Para coñecer a sede da Biblioteca de Galicia, a Cidade da Cultura organiza todo o ano visitas guiadas gratuítas.

Información na rede

A Biblioteca de Galicia está tamén na rede, no enderezo:

<http://bibliotecadegalicia.xunta.es>

Alí atoparás todos os detalles dos servizos, indicacións para a visita, actividades programadas, como chegar etc.



BIBLIOTECA DE GALICIA

CIDADE DA CULTURA DE GALICIA
Monte Gaiás s/nº ■ 15707 Santiago de Compostela

Horario ■ De luns a venres ■ De 8.30 a 15.00 h.

Tes toda a información en
<http://bibliotecadegalicia.xunta.es/>
<http://galiciana.bibliotecadegalicia.xunta.es>

